

Asasakka inuiaqatikka kalaallit qallunaallu.

Siullermik ukiortaami pilluaritsi.

Ukioq qaangiuttoq atoriigarput qujassutigisigu, aammalu immikkut eqqaamavakka ilaminnit ilaqtamminnillu qimagaasimasut misinnginneqatigalugit. Neriuppunga siunissami inuunertik nukittullutik ingerlateqqikkumaaraat kinguaariit ingerlaqqinnissaat siunnerfigalugu.

Qutsaviginiarpakka ukiumi qanngiutilersumi meeqqat utoqqaat inersimasullu suleqataalluarsimanerat pillugu. Neriuppunga siunissami ilissi nukiit tunniussukkasi inuiaqatigiinni annertuumik iluaqutigineqarlutik atorluarneqarlutillu ingerlasoqarumaartoq. Uagut naalackersuinikkut suliaqatugut tassuuna tunngavissinneqarnerput assut qujassutigaarput.

Qinersineq qaangiussimalerpoq naalackersuisullu sinnerlugit qutsaviginiarpakka inuiaqativut, inuiaqatigiit sullinneqarneranni isummaminnik ersarissumik saqqumiussuillutik peqataanerat, taannalu aamma neriuppunga siunissami atorluarneqarluni ingerlanneqartuarumaartoq. Uagut naalackersuinikkut suliaqatugut tassani annertuumik peqataarusuppugut.

Nunatsinni kikkulluunniit suleqataasut suleqataasimasullu annertuumik naalackersuisut sinnerlugit qutsaviginiarpakka, aammalu sunngiffimmini peqatigiiffippassuarni ingerlatseqataasut annertuumik sunniuteqarlutik inuiaqatigiinni suleqataaneranni qutsavigerusullugit; ilissi nukissamik annertuumik pilersuivusi, meeqqat inuusuttullu annertuumik sullinneqarneranni peqataallusi. Taamaammat qutsaviginiarpassi neriullungalu suleqataanersi siunissami ingerlateqqikkumaarissi.

Nunatsinni suleqatigiinneq innuttaasunut tamanut suleqatigiilluarnikkut pilersinneqartariaqarpoq, inuit ataasiaakkaarluta soqutigisavut aallaavigiunnaarlugit inuiaqatigiilli soqutigisaat aallaavigalugit suleqatigiinneq nukittorsarneqartariaqalerpoq. Innuttaasut pitsaasumik sullinniarlugit oqariartuuteqartarnitsinni ilaatigut malugineqartarpoq annertuumik pissaaneqarniunnerit allallu annertuut aallaavigineqartartut. Isumaqarpunga taakku piunnaarlugit suleqatigiinnerput nukittuumik aallartinneqartariaqartoq innuttaasut sullinneqarnissaat aallaavigalugu.

Nunatsinni aqutsinerup siammarneqarnissaa innuttaasut qanimut peqataatillugit qinersinermi annertuumik oqariartuutigineqartoq naalackersuisut nutaat pilersinneqartut aallavigalugu suliniarput, tassanilu aallaavigineqassapput innuttaasut misilittagaat, minnerunngitsumillu aamma kommunit peqataatillugit ingerlatsinissaq siunnerfigineqartoq peqataaffigerusupparput qanittumillu innuttaasut suleqatigerusullugit matumuuna saaffiginnissuteqarpugut.

Kattuffiit nunatsinni pingaaruteqarluartumik inissimasut peqatigalugit siunissami suleriaqqinnissaq inuiaqatigiinni aaqqissuunneqartariaqarpoq. Aalisarnikkut, sulisartoqarnikkut tunisassiornikkullu inuiaqatigiit ingerlalluarnissaat annertuumik tunngavilerneqarsimasoq peqatigiilluta ikioqatigiillutalu aaqqissuuteqittariaqarparput, aningaasarsiornikkut ingerlalluarnissaq nunatsinnut pingaaruteqarluinnartoq, minnerunngitsumillu aamma kommunit aningaasarsiornermikkut ingerlalluarnissaannik tunngavissiilluartartoq pitsaasumik aaqqissuunneqartariaqarpoq, aammalu imminut akilersinnaasumik siunissami ingerlajartornissamut aqutissat pitsaanagerusut nassaarineqarnissaat ikioqatigiilluta sulissutigisariaqalerparput.

Ilinniartitaanerup nukittorsarneqarnissaa inuusuttut piginnaaneqarluartut, inuiaqatigiinni pigineqartut, pitsaasumik periarfissinneqarnissaat ataatsimoorluta peqatigiillutalu aaqqissuuttariaqarparput, tassami Nunatsinni ilinniartitaanikkut pitsaasumik ingerlasoqalerpat annertuumik aamma aningaasarsiornikkut Nunatsinnut sunniuteqarlutartumik aqutissat tikinneqartussaammata. Taamaammat ikioqatigeeqqqissaarluta ilinniartitaanerup

nukittorsarneqarnissaa minnerunngitsumillu aamma Nunatta avammut attaveqarneratigut ilinniarfiit pitsaaasut aaqqissuunneqarnissaat annertuumik suleqatigiissutigisariaqarparput. Taamaaliornikkut siunissami kalaallit ilinniarluarsimasut nunaminnik napatitsisut tulluusimaartullu pilersissinnaagatsigit.

Aalisarneq inuutissarsiutitta pingaarnersaat ullumikkornit pitsaanerusumik aaqqissuunneqartariaqarpoq, soorunami piniartut aamma savaatillillu peqatigalugit inuutissarsiordermi nukittorsaanissat aaqqissuunneqartariaqarput, taakkunungalugu tunngasut annertuumik naalackersuinnikkut suliaqartugut suleqataaffigerusuppavut Neriuppugullu pitsaasumik alloriartoqarnissaanik siunnerfilimmik angusaqarluarsinnaasugut. Aamma qularinngilara innuttaasut misilittagaqarluartut tassaniimmata annertuumik siunnersuineranni pitsanngoriaammik angusaqarluarsinnaaneq.

Nunatta avammut samminera nukittorsarneqassapput avammut attaveqarluarnikkut nukittorsaasoqartariaqarpoq. Naalackersuisullu nutaat siunnerfigaat Nunat Avannarliit aammalu Akilinermiittut eqqarsaatigalugit aallartitaqarnikkut nukittorsaasoqartariaqartoq, taamaaliornikkut niuerneq minnerunngitsumillu aamma ilinniarititaanikkut periarfissat pitsanngortinneqartussaammata, taannalu piomassuseqarfigaarput Nunat Avannarliit suleqatigalugit aaqqissuulluarneqarnissaanut peqataanissarput.

Aammattaq soorunami Danmarkimut attaveqarnitta, ullumikkut ingerlanneqartup, patajaatumik siunissami ingerlaannarnissaanut annertuumik qularnaarinissamik anguniagaqarluta suleqataarusuppugut, tassami inuiaqatigiit taakku marluk ukiorpassuarni attaveqalersimasut, minnerunngitsumillu aamma ilaqutariissutsikkut attaveqartut pitsaasumik sorlaqarlutik ingerlariaqqinnissaannut aqutissiuussinissatsinnut peqataarusukkatta.

Innuttaasut, nunatsinni, kajumissaarniarpakka naalackersuinnikkut sulialinnut annertuumik attaveqaqqullugit, tassami pisariaqartipparput innuttaasut qanimut suleqatigalugit siunissami ingerlariaqqinnissatsinnut ilusilersuinnissarput, ilissilu misilittakkasi aammalu sulinissigut paasisasi tunngavigalugit attaveqartarnissarsi uagutsinnut naalackersuinnermik suliaqartunut assut pingaaruteqartoq oqaatigissavara. Tamannalu qanittumik suleqatigiinnikkusussusermik isaassinerusoq neriuppunga atorluarneqarluni inuiaqatigiinni sulinnermi qitiutinneqalerumaartoq.

Timersortartuvut nunanut allanut unammisartut, annertuumik nunatsinni avammut kiinnernitsigut malunnarluartumik sunniuteqartumik Nunatsinnut takutitsisartut, annertuumik tapersorsorneqarnissaat tamatta pisussaaffigisariaqarparput neriuppungalugu taamaaliornitsigut suli pitsaanerusumik Nunatta avammut nittarsaanneqartarnera takutissinnaassagipput. Piumassuseqarpugullu timmersortartut pitsaasumik atugaqarlutik Nunatta avataanut unammiaartortartut aaqqissuussiffiqineqarnissaanut peqataanissatsinnut.

Innuttaasut ataatsimoornissaat pingaarluinnartoq oqaatigissavara, taannalu neriuppunga ataatsimoorluta ilusilersussagipput tassami uani malunnarpoq qineqqusarnerup ingerlanerani ilaatigut inuiaqatigiit marlunnut avissaartinniarneqartut. Taakkunungalugu isumaqarpunga nukivut atorpallaarivut, akerlianik nukivut atortariaqarpavut ataatsimoornissarput aallaavigalugu suleqatigiinnissatsinnut. Neriuppungalugu paaseqatigiilluta siunissami kalaallit qallunaallu akunneranni pissutsit aaqqinneqarumaartut, tassami siunnertarineqanngilluinnarmat inuiaqatigiit taakku marluk akornanni aporaatsitsinissaq. Suleqatigiilluarnissamut naalackersuisut peqataarusuppup, isumaqarpungalugu taanna aallaavigalugu suleqatigiinnikkumaneq tamatta ilusilersorlugulu suliarisariaqaripput.

Innuttaasut kiffartuunneqarneranni suleqataasorpasuit tamaasa qamanna pisumik qutsaviginiarpakka; inuiaqatigiinni pingaaruteqartumik inissisimanissinni minnerunngitsumillu innuttaasut aallaavigalugit sulinissinni, naalackersuisut sinnerlugit qutsavingaarpasii.

Pinngitsoorneqarsinnaanngilasi, ilissi sulilluarnissigut nunarput issittoq najoruminaatsoq

ilaatigullu peqqarniissinnaasartoq aammali alianaassusersuarminik takutitsisartoq, pitsaasumik sullipparsi, neriuppungalu suleqataanersi suli pitsaanerusunngorlugu siunissami ingerlateqqikkumaarissi.

Kalaallit inuiaqatigiik ataatsimoornissaat minnerunngitsumillu aamma akisussaaffimmik tigummiqartut kaammaattorusuppakka peqataalluaqqullugit, taamalillusi takutissinnaaniassagassiuk nunarput nammineerlusi aqqussinnaagissi, aammalu suleqataanissigut pitsaasumik inuiaqatigiinnut inuiassuarnullu allanut takutitsisinnaasusi.

Meeqqat siunissami isumalluutitta pingaarnersaat, pitsaasumik periarfissinneqarnissaat tamatta pisussaaffigisariaqarparput. Meeqqat pitsaasumik periarfissinneqarnissaat kaammattuutigaara, kommunit inuiaqatigiillu peqatigiillutik ilusilersussagaat, taamaaliornikkut siunissami innuttaasut nukittuut pilersissinnaagatsigit.

Minnerunngitsumillu aamma inersimasut utoqqaallu qutsaviginiarpassi, nunatsinni suleqataalluarnissigut Nunarput ullumikkut ingerlalluortoq pilersissimagassiuk, aammalu kajumissaarusuppassi maligassiulluarlusi meeqqanut sullissineq ingerlateqqikkumaarissi.

Ataqqinartorsuaq, Dronningi, ilaquutaalu tamaasa juullimi ukiortaamilu pilluaquavut. Neriuppungalu kalaallit qallunaallu akornganni attaveqatigiinneq suli ullumikkornit pitsaanerusumik ingerlanneqarumaartoq. Aammalu qujassutiginiarpara Dronningip nunatsinnut soqutiginnilluarluni malinnaallunilu suleqataasarnera. Neriuppungalu siunissami peqqilluni aamma tamanna ingerlalluarumaaraa.

Inuiaqatikka asasakka, ukiumut nutaamut iserluaritsi ilissi sulilluarnissigut nuna manna pilersinneqarsimasoq inuiaqatigiinni inuuffigiuminartunngorlugu ingerlanneqarlersimasoq takutissinnaanngorsimavarsi. Taannalu nuannaarutigalugu tuppalliutigaara, naalakkersuisut inuiaqatikkalu sinnerlugit.

Kalaallit qallunaallu ataqqeqatigiilluta ingerlanissarput siunissami ingerlattariaqarparput, tassami pinngitsoorsinnaanngilarput ataatsimoornissarput.

Naggataatigut taallortorsuatta inuiattut erinarsuutitta naanerani oqaatigisaa naggasiutigissavara tassalu imaappoq:

“Taqilluni naami atunngiveqaaq;
kalaallit, siumut makigitsi!
Inuttut inuuneq pigiuminaqaaq;
saperasi isumaqaleritsi.”

Qujanaq, qujanarsuaq ajunngitsumik kiffartuussinissigut nunarput pitsaasumik suliffigiuminartunngorlugu napatissinnaanngorsimagassiuk, neriuppungalu siunissami ingerlalluarumaartusi.

Tamassi ukiortaami pilluaritsi.

Guutip nunarput sernigiliuk!